

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 7 1940

T 3150/32.83

7

前重平六十四期

孫

總

法

乾隆四十六年重脩

祁縣志

祁縣志卷十三

祁縣知縣陳士時編輯

藝文四

墓表

哈佛大學漢和
圖書館珍藏印

明

浙江副使閻睿墓表

劉龍尚書

予同年閻公憲副致仕餘二十年卒且葬適予給由過
家山其孤師賢奉方伯郭公克諧狀自祁來請表墓於
時冗迫諾而未及應也比還南都復屢書速之憲副予
同鄉兩同年好友之良而厚者師賢之孝亟圖不朽予

永集元 卷一三
奚以辭公諱睿字汝思號三樂道人曾大父諱孝先大
父諱棟世業農考諱威精律學由椽史任通州倉副使
陞上海稅課局大使蒞官勤慎不苟取有政聲配呂氏
生公三歲失恃幼不好弄性敏善屬對其師毛生嘗出
句覘之曰小水難成海卽應聲曰織鱗解化龍聞者知
其爲遠器稍長受業於上海盧教諭通禮經旁及諸書
作文有奇語上海令召而試之謂稅課局曰子雖未秩
有是子奚啻滿載尋以外艱服闋補邑庠增廣生大爲
憲學所與領弘治乙卯鄉薦登己未進士授永清令邑

素號難治至者輒免去公誠信結民惠愛爲政聽訟不
施鞭朴自得其情爲剖處適平悅服而去學校傾圮鳩
材修葺作講堂饌堂集諸生討肄給以薪米時自考其
進退士爭奮勵邑爲有才歲辛酉大蝗公召民捕之以
倉粟準其獲積蝗數千石隣境多飢邑不爲害撫臣上
其事賜銀幣勞之邑有壽府莊田地下多沒於水民困
於徵公履勘蠲其租若干牧馬草場多爲皇莊兼併公
清理復故地百餘頃霸州嘗缺守其民欲得公牧邑人
恐爲所奪各以狀上巡撫都御史洪公宣之洪笑曰此

官旦夕擢風憲爾曹胡以守令爭哉考績封稅課如其
官母呂孺人旣被召老幼遮泣車不可進解其履挂邑
門正德辛未流賊突入晉境至祁民悉驚竄賊渠蓋永
人戒其黨曰是吾侯故里也毋敢犯相率拜廳畢繫馬
數匹而去巡撫李公乾夫嘗寄公詩有暴客感恩曾繫
馬小民懷德願留靴之句初授陝西道御史卽風裁著
聞奉璽書查盤甘肅諸鎮芻糧類多折閱與守者皆鬻
子償有殞生者公爲治包攬清兌給程滫爛疏其狀釋
六十餘人暮經祁連山宿山下郵舍夜聞金鼓聲起視
無他大雪被地左右曰是爲敵衝宜急渡之路險而滑
非雪不濟山後有霍將軍廟其神之祥與公過而拜之
咸以爲異再按陝時逆瑾擅權大開賂門凡公出者歸
必厚遺否則中傷之公曰吾求自免民何辜禍福命也
奈何真鏞之亂實遊擊仇鉞所定總兵官曹雄爲瑾親
欲攘其功公上疏別白其狀瑾怒遣錦衣假他事逮之
未及而瑾敗公獲免陞浙江按察司副使巡視海道初
瑾革是官倭夷數入寇豪民泛海通番邊境不寧公至
治戰艦厲士卒嚴禁令海道肅清甲戌考察當事者與

公隙署以久病報罷公適在海上從者馳白欲公爲歸計叱曰功名自有定分吾平生清苦可質鬼神顧以去官盡棄耶卽日還省篋中惟案牘而已時論囂然稱惜家居以圖書自玩或野服芒鞋徜徉林壑又號晉郊耕叟親族不能婚者輒爲周濟友人廣昌令王佑卒貧不能葬公曰是固在我厚爲殯之嘉靖丁亥遇恩詔進階從三品易簀時訓諸子曰吾以清白遺爾等第勤儉持家不廢耕讀吾死且瞑目賦詩一章正襟而逝實十一年正月四日也距其生天順五年五月五日壽七十有

二配劉氏封孺人克修內職子男五師善早卒師賢庠生師良師文師德庠生孫男十紹芳繼芳繩芳聯芳緝芳纘芳錦芳俱庠生維芳縵芳繹芳曾孫男五講論諮談誦女二長適判官郝廷佐次適儒官許登仕孫女二一適庠生馬雲衢一尚幼曾孫女五於乎天道以禍福設教載之經傳世俗或未之信以爲不盡然者不知君子道其常而畧其變變則有不盡然常則卒無不然故曰人定勝天天定亦能勝人理也以公之才砥礪名節迥出時流而用則未究自世俗觀之爲善者怠矣然優

游晚齡眉壽踰七子孫之盛承家接武壘壘方興天之
福善果爲不爽彼此乘除間有遲速要之不出範圍未
可以淺近窺也豈特憲副然哉書以表之

長安知縣閻繩芳墓表

殷士詹少保

於乎是爲故長安令閻公之墓公諱繩芳字世武漫川
其別號云世居晉之祁其上世詳於家乘曾大父威仕
上海稅課大使以子睿封文林郎永清知縣睿公大
父也舉弘治己未進士拜監察御史當武廟時以抗
直稱仕至浙江按察副使進階亞中大夫父師賢爲文

學弟子員母陳氏太谷人憲副璧女以正德乙亥四月
十八日生公幼挺殊特不與常兒羣端凝靜默亞中公
愛之每出携以自娛間試屬對輒應如響時出奇警亞
中公愈益喜嘗曰吾宦橐無可貽者賴有此足慰人意
卽飲水甘矣羈州遊黌校有聲每試取高等舉嘉靖癸
卯鄉試登丁未進士觀工部政謹恪有恒度卽爲大司
空文公所知長安爲三秦省會賦重役繁富俠以吏爲
奸以詭倖免獨苦細民長吏故難其選銓曹廉公才特
授是邑公下車問民所疾苦徐得其情首案大猾吏數

輩核戶口丁田度其盈縮而差次之約爲章程擇爲害
吏主其籍出納纖渺具有可覆定徭役高下心計手校
不以他假賦之各當其力民大稱平富民某貧緣重賂
規輕徭公怒曰敝吾民者若曹也必抵其罪而重之役
巨璫有弟坐法當死行當事者金移鞠於公覲從未減
卒論如法終南豪族奪民腴產而遺其稅公取歸其主
繇是失業者皆復常奉檄董治棘闡諸役綜計精覈費
捐往之半其治邑疆察敏幹率稱是蒞法無所撓諸宗
藩豪右歛跡避之請謁不敢及其門治行大著部使者
交上其狀行當徵拜矣會監司於臺使有郤疑公中之
同列者多忌公遂致萋菲適庚戌大計竟坐是解職識
者咸爲扼腕相與唁公公第遜謝不敏畧不致辨策蹇
歸故廬杜門却掃左圖右書吟弄以自適邑故多長者
要結爲社佳辰輒選勝登臨觴咏竟日殊忘今昔之感
焉公幼有至性內行純白孝友孚於倫內人無間言侍
親疾衣不解帶者踰月鬚髮幾白子弟從之遊時探奇
挾奧皆虛往實歸與人交無少長必用其情親仁樂施
急人之難如不及里中有紛結不解者取公片言立斷

各首服去故間黨咸樂公謂公弗久試天固以篤桑梓
矣乃甲子閏二月三日以末疾卒於家享年甫五十明
年二月十七日諸孤營葬邑東會善之陽所著有禮經
通旨詩學體要盤谷藏稿燬於火予昔與公俱以禮經
舉會試爲同門友是時同經士蓋二十有一人雖仕淹
速弗齊亦各盡其器獨公一試爲令未三載輒用方潔
見忌遂淪落不起所抱者不酌一退乃僅以善其鄉閭
足自徵信然竟沒不顯往聞公訃予實重悲之今年公
仲子談以選貢入京師持山東布政使前太史同年亢
公思謙所撰公誌銘謁予請表其墓道之石予旣重有
感于公也乃今墓草宿矣忍令泯泯無傳邪遂按志叙
之公配武氏庠生廷璋女敵德惟偕有丈夫子三諮談
誥諮國子生娶張氏典膳冲霄女談選貢領京圍鄉薦
娶程氏貢生天喜女誥娶許氏知州鴻程女三子并彬
彬隱起翼儀可占然則公篤於實薄于名豐於才嗇于
時天之祚公其殆有意于斯夫其殆有意于斯夫

經歷李恕墓表

馬雲雷

邑人

貞軒公仙遊六年後堂弟登進士官拜行人司行人今

轉右司副感公教澤惜公葬時缺志乃率公子若孫持狀謁余表其墓公於余爲業師義不容辭按狀公諱恕字宗貫號貞軒其先世爲隴西人唐末宦遊太原遂家焉國初有祖諱繼先者遷於祁生祖彬彬生祖有道有道生祖鳳鳳生祖子瞻配溫氏繼邢氏溫生公父邢生叔五人公父諱銘字德新號月坡配楊氏耀州同知綱女是爲公之母龍山公五叔子也月坡翁精舉子業蒙養後學多爲世用性好施予人有借貸不責償生公六七歲卽穎異人以爲善積之報公率父訓髫年遊芹泮每試輒冠多士性慈惠胸襟廣達好成人之美邑庠弟子多出其門或遇他館諸生亦與講說經史遇鄉人亦諭以孝弟忠信人有犯不較得意不充詘月坡翁施予過多財或匱未嘗介意廩食有贏不吝周急口不言人過無疾言厲色人皆嚴憚以時義擅名尤長於古作且工盡十科不偶竟入太學抱藝蘊才之士見公皆爲歛衽大司徒汶上王公聞其名懇大司成延宦塾俾淑諸子謁選除長安丞人多惜之長安附郭供億繁瑣常缺令公攝逐侵暴抗冗索當道有惜民財如已財之獎行

途輒剖數事人服其敏汧陽王府兄弟爭財七年不決公曉諭遂成讓德儀賓蕭廷祿搶糧搥及府佐付公訊而宗儀凜凜永壽王府與太常寺劉卿爭房基詞連三載累死府伴咸寧尹往按其事宗人以穢辱劉卿旁及咸尹尹馳馬走撫堂改委公宗人服公素行事始平民人劉景胡等千餘困於徭役逃亡地土得公蘇而還張登高等誣陷大辟公與辨釋至與賑貧民周繼昌等不計也修壩橋修貢院修東關城不枉一力不妄一錢署商州及三水縣淳化縣山陽縣所在有去思宗藩祿米

衛軍衣糧得公放而悅其他善政壘壘監司重之時方尚通公守正銓曹量移公護衛經歷出長安之日老穉擁行哭聲震地自晨至晡不能去二三程外猶有扳號者公至韓藩未幾卽卸政還里人方謂公種福積德壽可百年乃七十有四而終終之日爲嘉靖四十一年七月初一日也訃聞遠邇痛悼配段氏裕有淑德先公八年卒繼配張氏子男二長自省配張氏儒官文重女繼蘭氏次自全配胡氏繼孔氏女三一適王之屏一適許直一適申思考自省男二道規配孟氏道矩夭折女二

一適文水縣郝經歷孫瑤一適余孫之秦自全男五道
準配溫氏大興縣尹溫尚武女道法配馬氏余侄庠生
元女道傳配閻氏進士漫川男庠生諮女道溥配范氏
道高尚幼女一適賈愷道規男二與郭配閻氏與朱配
原氏庠生道祖女繼范氏道準一子一女道法一子與
郭一子俱幼於乎公博學不幸而嗇於科第公鴻才不
幸而滯於資格使得志行道則格君澤民移風易俗的
有大可紀者乃戢翼弗張良可惜已雖然劔埋浮彩蘭
菱存香有不隨死而亡者愧余謏陋無能表公萬一他

日發幽潛悉盛美以垂永世當必有名筆焉謹書以俟

贈行人司司副李鑰墓表 王家屏 修撰

贈行人司右司副啟菴李公余同年憲之父也憲自登
進士官行人轉右司副蓋時時追慟其親每語余曰憲
甫髫受書先君尚記先君夜然膏課讀時家貧膏不繼
燎薪代之也稍長遣從先伯兄學伯兄邑居先君恐憲
不能離遠則更日一至邑中以爲常先君卒先母韓承
先君志懼憲廢學至躬績紝以資憲費不足卽脫簪珥
無難焉以先父母之恩勤庶幾食報一旦竟弗逮以死

傷哉語畢泣數行下余深悲憐之會上登極覃慶得贈
父如其官母爲孺人因奉使過家乃載冊書告墓已益
治封樹周以繚垣前豎綽楔中建詞亭徵余詞表諸遂
道余旣君同年又其孝思有足述者則不敢辭按公諱
鑰字德握別號啟菴其先隴西人唐未有宦太原不返
留居東崗者洪武初諱繼先者自東崗遷祁遂爲祁人
繼先傳三世生鳳鳳生子瞻娶溫氏繼邢氏生六子長
銘次鎧次錠次贈公次錫次欽公爲人質直無他嗜好
少居城中出見紛華心厭之曰丈夫不自苦筋力安能
飾衣履從市兒游乎則去田城趙城趙者趙簡子故里
其地僻甚公往旦夕操畚鍤作勞田間人罕識其面者
歲以所獲輸父母父母喜謂諸子中獨季子治生力也
公雖業農未嘗沾沾效儒生然少間卽涉書史以自娛
其居處言動壹遵古人而內行尤篤事父母出入必告
曰古人有事必告天吾有事必告父母父母與天一也
居兄弟間曲盡友愛以兄銘出前母事之倍恭始田城
趙旁近有失業田數頃爲衆所據族人謀奪之則陰諷
公曰彼貿貿來田者皆無所受券宜及其未定取之多

則可併寡則可分也公厲聲曰彼利人之亡而有其田不義已甚從而爭之則我與若奚間也吾寧拾穗而食不忍受不義名言者乃止甲午歲饑公家廩僅僅自給顧時出粟以周餓者或設糜粥食之里中李時奈等十餘人餓且死咸賴公得活配孺人武氏韓氏並有淑德武所遺女韓拊之一如已出資嫁甚厚公旣任義好施孺人益佐之以慈惠故貲稍裕輒盡人或勸公孺人居積公孺人指司副君謂曰有兒如是積善以貽之顧不昌邪竟如其願云公卒嘉靖庚子九月初七日距生成化丙午三月二十九日年五十有五韓孺人卒嘉靖壬子三月十六日距生弘治己未正月十七日年五十有四子一憲卽司副君娶王氏贈孺人繼董氏又繼呂氏封孺人女一適趙時隆卽武所出孫男一自知庠生娶武氏孫女一適庠生馬化麟史家屏氏曰世俗熙熙交鶩於利卽寸畛尺域必爭訟或彌年不休也富有貲者乘人之急而收倍息實不能徒假人一錢以公族之衆視反侵地若索諸寄耳而義不苟取至其拯困救乏則不啻自七箸間節之非心誠仁愛敦行善者乎蓋司副

君既貴乃知天之所以報施善人者不虛雖不逮祿養其榮名無窮矣余特論次其畧令後之考德者有所觀覽焉

孝廉馬雲駟墓表

王惟敘

廣川

晉陽之南有孝廉曰孺眉馬公以行誼文章重於天下者垂四十年余獨未得交歲丙戌余承命來尹於徐則去公居里僅咫尺亦未獲走一价以通聲氣於公戊子春公子而龍持所業來謁談語移日因益悉公行事方欲與公期會於廬未幾而公歿矣余嘆哲人之云亡悲吾

道之無輔爲之震悼數日又踰年而龍爲公什藏既成

自奉公狀來請余言以表其墓余愧謝不敏顧念知己

之託誼未可辭也不得已乃爲之表謹按公諱雲駟字

是字別號孺眉龍門之裔也洪武初有祖名千者自夏

遷於祁十傳而至公始以儒顯公生而穎邁日記萬言

作爲文辭汪洋灑肆與古大家上下年十二補弟子員

十八食餼二十一乙卯舉於鄉以詩經魁本房爲人天

性孝友豁達豪爽尚俠任義輕財好施直諒而方介事

其父應昌公日必三問靡間朝夕執親之喪哀毀踰情

與兄雲駿友愛篤至庭無間言其治家嚴而有禮閨門之內肅若朝廷其交友也信而不欺然諾必踐急人之危雖千金而不吝平生解紛難振孤窮恤死喪濟困厄蓋遠近沐施者若而家其胸中洞達無城府不邇聲伎不媚勢要不畏強禦不侮鯨寡慷慨悲歌毅然有身任天下之志十二上公車不第侍御陳澹元中丞蔡雲怡督臣馬擎宇廵方黃慎菴俱前後交章薦其賢終不就仕山居田隱惟以詩酒自娛古玩名書充積几案客有遇者必留飲竟日極醉始罷四方之人知與不知莫不以公輔期之故一時名公巨卿無不求友於公公雖與之遊未嘗一事輕干權貴之門其視爵祿榮寵聲色貨利澹然無所慕也晚年習導引之術常曰吾大限應在河圖五十五戊子夏忽邁小瘡寢疾數日而逝嗚呼若公者可謂善全其德者矣說者謂亡明之季士大夫習爲狐媚脂韋之行以誤其國使公得用於時充其剛方正直之氣以砥柱於狂流頽波之衝其功業必有可觀然竟以艱於一第不獲少展其才徒使窮老山林芬其行於詩文杯酒之間齋志以沒豈非斯世之不幸哉故

君子不惜公之死而惜公之不用蓋悲其遇也公隆顛
豐頤量洪善飲聲若巨鍾望而知爲偉人生於萬歷二
十二年甲午十一月十一日卒於順治五年戊子閏四
月初七日享年五十有五其曾祖諱進有隱德祖諱天
徹席豐樂善蟬化於楚之武當山父諱應昌好詩書積
多懿行兄雲駿爲國子生以文知名子而龍卽金門士
也恩拔貢生文章名冠山右其豁達豪爽酷類其父孫
振世垂髫入類凡公之家世行事具詳於誌余不具載
特表其大者以告於世如此公居於祁之高村里邑東

北之魯村鄉

祁縣志卷十四

祁縣知縣陳

時編輯

藝文五

墓誌

明

高士閣師賢墓誌銘

彭範 參政

三晉間有高士閣公者識與不識皆稱為認菴云余官茲土方圖登堂而公已矣恨未有以識面也公嗣子長安君持靜寧半刺陳君時道狀以誌銘屬余夫長安君者與余同舉進士仕於長安令故云按狀公諱師賢字

齊之別號認菴世爲太原祁人曾大父棟不仕大父威
爲上海稅務大使贈文林郎永清縣知縣父睿由進士
起家歷任浙江按察司副使母劉氏封孺人於弘治五
年十月十七日生公兄弟五人公爲憲副仲子少負才
名童時卽豪邁不羈弱冠從宦錢塘受毛詩於王君篋
與莆田吳凌仁和胡昱相友善數子皆名士咸以公公
輔期之已補邑庠增廣員潛心理道遂厭科舉之學浩
然辭博士就所居會善里奉二親甘旨惟謹二親皆喜
公孝與兄弟處怡怡相得至老無閔牆之嫌性好施里
中有急輒罄囊周之不責其償以故生計亦涼甘分茹
淡終日歛膝危坐晏如也壬辰憲副劉孺人相繼卽世
哀毀踰制治喪一準文公家禮不效土風作佛事襄事
鄉俗化之服除構室城北村庄雜植花卉左圖右史日
坐其中集田夫野老爲講史鑑品藻古今人物相與上
下其議論父老咸環坐觀聽呼僮酌鉅觥酬歌詠移時
靡倦常誦人生得意須盡歡莫把金樽空對月之句掀
髯長嘯謹然自得塵視軒冕睥睨一世負用世之才甘
恬退之樂於乎公真當獨行之士也然氣昂不能下人

與鄉大夫絕不往來至于鄉人則又油油親附各得其歡心家庭義方之訓凜凜子若孫侍立終日未嘗見有怠容遣長安君從太原大儒李君約受三禮盡得其傳嘉靖癸卯領山西鄉薦舉丁未進士授長安令公不之官署但以持已撫民戒行故長安君恪守公訓不祇奉上官卒以此構誣解任公亦不恙惟徜徉山水雅歌投壺時人莫窺其際蓋公生有至性習俗所不能染身有真樂功名所不能移固太原之鍾氣而黨泰之儔匹也嗟夫今之不仕進者孰不曰高士或咨肆任達遺落世事或交遊有位依其勢利若是者雖不仕奚足賢乎然則孝弟慈信家鄉靡間有如公者凡幾人耶今年首夏偶病水腫五月初九日卽不起壽六十有八配陳氏太谷憲副陳公璧女有婦德人稱賢母生子繩芳卽長安君娶武氏有孫男三曰詔曰談皆邑庠生詔娶張氏談娶陳氏棠棣聯輝可科第望增啟閭氏之間者曰誥聘許氏曾孫男三嗣龍嗣夔嗣愷孫女二長適庠生呂銑幼許字范尚緒曾孫女一長安君將以是年七月二十七日葬公於先壠之次誌而銘之禮也銘曰士不得位

元鼎志 卷十四 三
才無所彰託跡衡門名靡弗香居身孝友傳家義方依
承先德樂彼天常徜徉自適既壽而康有子有孫厚德
流光

直隸大名府通判戴賓墓誌銘

張四維 少傳

給諫戴君光啟之奉詔西行邊也其父堯川公蓋耄壽
在堂過里中省焉比報命遂載公來京師給諫以讜正
當上意晉掌兵垣已復同考會試公喜見其子之達而
安其孝養愉愉如也居無何公疾作思歸給諫亟以情
請扶侍西還道次中山公卒給諫既扶柩抵里乃屬李

水部憲狀公世行而爲書祈余銘詞甚哀余不忍辭按
狀公諱賓字汝敬別號堯川姓戴氏其先代州人也明
初有自代來占籍於祁者世遂爲祁人曾祖子文祖緣
父公禮有材諧辟爲縣掾史以文無害見稱諸掾間性
喜儒嘗以不獲經術起家自恨取程媼生公穎敏有異
質父大喜命之儒垂髫卽能文弱冠補縣諸生下帷自
奮無間寒暑視學使者異其文每試必高等簡入河汾
書院業益進年甫二十四以選貢入胄監當是時文名
藉甚人咸以高第擬公顧以數奇無慮十上有司竟不

一遇既年踰強仕承父命謁選銓部授大名府通判監
理宣府南路糧餉宣鎮列屯戍而仰芻粟者以鉅萬數
賈人爲間利其間往往潛行賂理餉左右公至則正色
持法蒞之倉塲肅然嘗攝守蔚州會敵入諸城守具未
備而赤白囊交至公爲部署保伍飭器械集糗糲應之
甚整暇州人恃以無恐俄而援兵四集士馬有饑色公
一夕爲具煨炒千斛給軍其幹局敏贍若此公當官執
法不撓而惓惓以潔已愛人爲務甚得軍民和大吏將
薦之朝乃復索賄公所公曰吾清貧守一官黽勉自效
亦異樹尺寸報國耳今若此將安應之不去且有悔乃
白於父飄然解綬歸歸而邱井依然偕二三朋舊逍遙
爲詩酒社者且三十年有餘適也公生平事親至孝務
先意承其懽遇兄弟族黨情愛肫肫然諸婚喪未舉者
輒捐貲爲代辦與人交坦夷無崖岸見片長稱之不容
口赴人之危急之甚於已其自奉又甚約故鄉間間人
人德公無問識與不識咸欽慕之以父雅意好儒闢塾
貽訓孜孜冀以經術成先志今給諫業已榮顯其餘子
若孫類能率其家學斌斌然稱儒裔也盛矣公以正德

己巳五月十四日生萬歷庚辰四月四日卒壽七十有二配許氏先公三十八年卒繼配許氏先公二十年卒俱有闡德給諫邁兩宮徽號詔恩進公階承德郎贈二許皆安人公凡四子三女先安人舉子光政娶申氏繼趙氏光教庠生娶許氏光啟辛未進士今兵科都給事中娶程氏封孺人女適許九州後安人舉子光肇庠生娶胡氏女適許可教馬應魁孫男八人禩祉祚祐俱庠生祐禔禕禔孫女三人曾孫男四君知君遇君賜君用曾孫女一給諫兄弟卜以本年十月二十四日葬公於

城東南十五里之新阡奉二安人之柩而合祔焉禮也銘曰孰是明經而靡遂其名孰是好修而弗究其行貽慶式穀濟濟滿庭亦既享厥成壽康以榮茲惟德之程有鬱佳城既固且寧永世成信視此刻銘

工部郎中李熹暨配墓誌銘

戴光啟 邑人

龍山李公余嘗與之同官京邸出入相友如在里閭時比卸政又相與訂盟結社徜徉詩酒一切城府都置不問庶幾托言莫逆公既沒余與二三老友哭掘示信嗚呼荏苒於茲已三易冰暑矣其子李自知輩卜以今年

九月二十八日厝葬縣東新兆與其配王氏董氏呂氏合焉持狀請余銘余黯然久之若有不忍爲公銘者翻思先民有言一死一生乃見交情余固不文不銘奚以見情按狀李氏先隴西人唐末遊宦太原不返僑寓東崗洪武初名繼先者遷於祁占籍世廂坊十里遂爲祁人繼先傳彬彬生有道有道生鳳於公爲曾祖鳳生子瞻子瞻生鑰田趙簡子故里外託什一以遊而內操儒行樂善循理嘗不攘逋戶產設粥濟飢配武氏卒繼韓氏生公名熹字樂天別號龍山初娶王氏繼董氏呂氏

公生而穎朗甫七歲就里中傳迨十二歲從學於伯兄長安丞恕晚返燈下誦讀或無油然菊尖照之垂髫文辭雅致督學使者奇其材署爲學官弟子員久之聲藉甚每校文輒置高等直指吳公尤器重之曳青矜從遊者錯履戶外方業成將售於有司忽丁父艱母氏孀居恐爲生計廢學兼理耕織拮据萬狀公曲盡孝養出門數四步必告所之不數年韓亦卒於是痛思先訓績學益力歲戊午以詩列賢書然猶欲然自視藏修不輟十年一燈熒熒風雨不滅也戊辰登進士廷試悉邊務甚

爲主司稱賞旣而觀兵部政適西北屢警偏老墩墻頽
圯屬公齎帑金往修緝之己巳授行人司行人壬申陞
司副會今上登極覃恩贈乃父如公官韓及王呂爲孺
人奉使齊藩便道旋里一時人士咸爲榮之甲戌陞司
正前後居使署七年四奉君命所在皆嚴取予裁供役
采觀風尚盡忠納獻其平居不苟言笑及居官則侃侃
直言朝廷以爲雅稱使職丙子陞工部都水清吏司郎
中奉勅督理通惠及天津一帶河道兼理倉厰等務舊
分司蕪陋不足容公捐俸修之建雙坊對峙曰仰戴堯
天曰纘承禹績蓋以禹在帝世平成奏績而今若希其
明德而以治水焉者也仍起黜樓浚井泉砌墉於灣厰
儲水所以障水衝纍石橋於北門以利往來京師徒輿
緝竹木局以便儲材雖多所營造而磚石取諸碎餘力
役用其間從署厰改觀了無傷害又以新法圍商量水
過嚴價給不時殊爲商困乃詳陳疾苦於上以償其貲
且自懲胥徒躬携饗殮杜寺人之需索却饋遺之常例
商集材廣庶績咸熙通人多樹石紀其盛而通以南千
餘里轉輸不留國脉不涸皆其力也大司空郭公註考

滿有體國本於忠誠河間之衆工悉舉立身慎於防檢
出納之纖弊必除之語戊寅復值慶典加恩父母及妻
如制當是時公年六十餘矣宦邸嘗中痰火又不喜曲
奉貴人庚辰陞兩淮都轉運鹽使司同知遂請告而歸
公以久宦茹蘖積俸饒裕於是置睦族所先濟族之貧
者以及隣里鄉黨之遭凶荒者仍捨城西上地二十餘
畝爲義塚南澗築石樓樹花木樓中有琴有棋有酒而
附以有山有月等名九有樓下山環水遶雲影天光拍
手狂歌興溢海外題聯其上曰愛道肯干違道警思君

高起望君樓邑牧張公等見曰樂天之誠憂世之志兩
得之矣癸未冬尋卜子夏真跡於西河遊天龍洞以天
龍二字與已字號合掀髯而笑曰今而後謂我爲洞中
人可也及明年西遊華嶽東遊岱宗仗策騎驢遨遊勝
地起甲申迄癸巳十餘年名山大川無不遊歷其豪逸
放達類如此公信實剛毅人有失面折之或屢爲儇巧
所誑人得其利已當其失亦亡攸責其欺也生平不絢
美不喜甘脆綺麗之供家常食飲見多味必半撤去常
衣卽累經澣綴弗棄去不乘輿田冠野服混迹稠人中

見者或以老叟相呼初不知其爲大夫云極嗜學每發憤至忘寢食與人論討講一章書通及數十章津津貫穿灼見至旨無論立談坐語常竟昕夕不倦晚年益究理學好讀周易及明道先生定性書書於屏几居安樂玩彌久彌篤有絕韋遺意最不喜象山等語錄以爲禪學不宜附真儒而訂學部通辯明禪學顛狂之失示吾儒正學之的付剗劂以廣其傳曰道在是矣所著講說時義及古文辭有大學訓旨洗心臺文稿竊言俱不存宜人王聰慧真淑閑於內則上奉宗廟舅姑下御疏戚僕從慈敬之聲聞外內如一董蚤嬪儒門克修婦德呂節儉持身善相夫子事孀姑韓宜人奉養不少怠尤長于治家人產亦以勤孝聞公正德庚辰年十月初二日生萬歷甲午年正月二十二日卒享年七十有五男二長自知監生娶武氏次自問庠生娶趙氏繼娶羅氏柔氏女一適邑庠生馬化麟孫男二長而淳廩生娶武氏次而洵庠生娶許氏曾孫男四女一皆劼公登跡衡門奮身甲第自少自壯多遭窘厄而志趣超越動以天下事爲己任膚功可奏華要可躋期頤可待乃以朴畧生

元鼎志 卷十四
往往不諧衆口官止同都轉使壽未彌八紀使冲霄宏
抱竟齋以没天之所以靳公者何其忍哉雖然得全全
昌或必有陰隲于幽泉厚報於繼世者銘曰人皆有死
誰當樂只相彼展也君子幹國勤家焦勞莫齒有美之
良並名野史百千餘年貞珉在此

河南右布政戴光啟墓志銘

李維禎 京山

余分守大梁時祁戴公自西夏憲使遷右丞以邊事棘
未卽上余攝之久而公至相得如平生歡無何有流言
公遽行余復攝所司清戎督賦兩事公興革利弊悉當

情法守而勿失越十六年余承乏晉藩臬使人存問公
愧不能式廬大比士得仲子文度取高第而不果今甫
以明經待詔公車也而公卒且十二年會余友尹于皇
爲祁令才仲子體貌有加仲子介之以李中丞所爲公
狀請墓誌曰此先人治命也先生其無辭余知公稔按
狀言無溢美采而志之如左公名光啟字仲升先世自
代徙祁者曰成忠四傳子文子文子緣緣子公禮公禮
生公父賓以大名別駕晉階奉訓大夫祠鄉賢詳張文
毅公誌中母許安人三子公爲季生而敏悟覽書輒誦

屬文立就父喜是必大吾門矣喪母哭泣擗踊見者憐之弱冠補邑諸生試屢冠首從楊郭二先生學祁寒暑雨不輟功甲子舉于鄉辛未成進士敵新附廷議除甲科任邊寄者授會寧令削一切苛政省費寬徭以羨金供傳置不煩民流移復所詔履畝均田如額而止不加賦始築東關城什伍守望相助禽隣邑盜魁邑桃花山盜藪聞風遠遁曲周王司馬閱邊薦其才可大授也居四年會寧人有神明之目或以其名止兒啼生爲立祠名拜工科給事中知無不言則有請以臬憲攝馬政請給厰庫關防之疏已進禮科右刑科左兵科都給事中則有明詔旨議撫臣修問刑條例格大監用營馬之疏論誠意伯劉世延多行不義倏廢倏復且謝且辯言謝則不得辯言辯則不得謝因辯以謝謝不誠假謝以辯辯不信疏未卽下人爲公危上知公言忠世延受罰計吏有大班糾劾例公聲吐宏暢上問爲誰左右以名對上稱善侍經筵目屬之持節封永和王隨奉命閱陝以西三邊悉心區畫所條八事甚爲江陵相所知同考會試申文定亟稱其知人以父喪歸服除除刑科序遷河

南叅政分守河北百度維貞八攝藩臬諸篆應之裕如
歲凶民饑設方畧以賑全活鉅萬潞府工興計工出值
令民自應募閭閻無擾晉西陝觀察使備兵西夏西夏
三面控敵餉誦士呼庚癸酌盈濟虛師有宿飽督府梅
公一切倚辦公敵忽要賞停市咨公三策不市而去市
而後去不與市不去知彼知己當在中策果如所料守
備某幾敗市事亟從與大將軍鼓行而前敵辟走家丁
以汰浮食歸怨於其鄉大夫將不逞以嘗撫臣公召而
諭之餉不敷吾責也餉外吾何可過予女曹不畏吾劍

耶皆頭搶地謝而退簡師庀賦屹然國家干城忌者誣
公取江陵子爲行媚許文穆獨明其不與江陵昵其爲
令入秦闡錄春秋士六人皆一時選也誣者遂寢稍遷
河南而修卻者復嗾台臣抨公曩事或謂公曷自理曰
吾不能與衆同塵內省不疚何容辯辯欲何爲遂歸構
適自園於宅東偏日與所善游讌觴詠間爲詩及小詞
俱清綺有致又采形家言葺學宮立書院建文昌閣祁
文人以故日盛自卜兆城南四十里之壽庄往來其間
徙先人墓穴與庄相望寄岷岵之思雖畎畝不忘君聞

朝事若西夏變曰啣拜以逆子故迫而成其人可一檄定也倭易與耳用購固非而勞師動衆大損國威况我兵實偏朝鮮而處侵攘驛騷夫何以得外夷心其成筭類此素無病哭伯子過哀遂病逝矣是日尚以臣事君忠時執誦之云公貌頎偉美鬚髯望之甚莊而就之甚溫膽知過人而深中隱厚先世督亢田讓之伯氏親族衣食婚嫁不給者取資如寄歲輯茅施義漿以安行旅疾惡如風事已卽消加之橫逆了不爲意不謁公府不赴賓筵民所疾苦直言無諱教諸子以樽節退讓守終

惇固母情行冥冥仲子多文爲富動不踰閑晉人稱公有子矣公卒萬歷四十有一年十有二月初十日距生嘉靖十有八年六月二十有六日年七十有五祁尹以輿論祀公鄉賢配程孺人貢生天喜女子三長濬昌縣學生娶祭酒閻公樸孫女先一年卒次運昌卽仲子娶淳化尹郭公儒孫女次沛昌太學生娶御史陳公功女繼權氏三老三省女女一適京兆田公疇子太學生慶年孫男六廷柎縣學生娶陳太學生心鑑女廷梅娶渠三老通落女俱濬昌出廷桓邑庠生娶任三老世廉女

元集志 卷十四
廷栻俱運昌出廷杼廷枸俱沛昌出孫女三一適前陳
心鑑子庠生奏堂一適寧化府儀賓程知務子振奇沛
昌出也一幼運昌出也以四十有三年十月十七日葬
自卜之新阡銘曰
官守言責分殊而盡職同秉憲詰兵事殊而奏績同三
秦兩河人殊而頌聲同名宦鄉賢地殊而奉祀同外臣
方伯位崇踰老以天年終子孫箕裘治弓金石文在坎
中公也明神罔恫

四川真安知州李自問暨配墓誌銘黃景昉

內閣

余觀余友文集所傳王右丞墨蹟異之云右丞故祁縣
人蹟藏元隧中至萬歷某年始著邑潛江令李公深加
寶惜手摹勒播之歌詠余意李公特嗜古雅流用以藻
飾吏治耳已乃知其儒者故潛精性命學晉人所爲稱
鳴六先生也公諱自問字無言其先自太原徙祁高王
父子瞻有潛德生鑰鑰生熹登隆慶戊辰進士官工部
以文章氣節重贈鑰如其官公工部仲子也幼端敏善
文爲父友館閣諸公所器以高才生受餼隸河汾書院
靡敢齒易之者先後學使者試屢前名在傳司成新德

李少司馬成名伯仲間公意顧邑邑不自得曰學止是乎儒更有向上一著會聞江右余公宗濬宿姚江學悅之公之於靜專淵篤其天性也生平視世味漠如旣聞道痛自刻厲嘗冬夏却爐扇三年凡先賢語錄近儒宗旨概能撮其精微以至律歷河渠屯政邊防諸大政亦多所叅攷慨然曰學在是矣致知非內格物非外時時提起念念放下大都本主敬入門徐質之河津復性江門主靜姚江良知豐城止修之解罔弗合者己酉舉於鄉主文曹公珍最加賞識壬戌署臨晉諭復與渭南史公記事往還商摧士服其教歲連登科第數人直指至特以理學名儒薦然當事落落鮮知者授楚潛江令非其好也勉之任詢民疾苦爲修築堤塍無筭按冊稽賦躬清出匿田三萬充藩府贍租之額民賴安堵時有聽斷溫顏開諭之而已三載政成擢守蜀真安州念工部公業得綸贈遂決意歸綜公生平初以才士名終用循吏著俛焉孳孳乃惟以學問一大事未明爲恐有所師友皆海內名流著述甚博余生幸與公同時南北阻遠不獲一把臂交余之於斯道也終夢夢焉已矣公居父

母喪如禮恭厥兄撫孤侄厚垂老不識等斛施人忘報望而知爲醇龐遇大利害稜稜必伸其志素與昆陵繆公昌期友善方璫禍熾諸君子危僅旦夕公正色曰一時邪焰有盡千秋清議難泯人定勝天終有見覲之期其卓識不撓如此識者又知公涵負遠也公生隆慶四年正月初一日子時卒於崇正十年六月十四日卯時享年六十有八元配趙氏繼羅氏桑氏俱贈孺人桑爲少叅仰齋公孫女佐公學舉案靜肅事姑孝所視自賓朋姻鄙暨僕御輩咸有恩禮子女皆桑出又繼母氏侍公宦遊賴其力男二長而淳選貢生娶延慶知州武惟謙孫女次而洵丙子舉人娶西鄉知縣許台儁女繼閻萃謨女女二長適平涼同知吳戴光男用極戊午舉人次適兵部右侍郎鄭宗周男立忠庠生孫男四長人文庠生娶光祿寺署丞母吝女繼渠通雒女次人吉庠生聘廩生閻玠女次人善聘國子生張士奇女淳出人杰庠生聘尉氏知縣戴運昌孫女洵出孫女二一適廩生溫而理子且惠淳出一字徽州知府頡鵬子某洵出曾孫男一人文出四孺人同祔公葬縣南之新阡屈指公

曩昔交遊盡矣卽友夏亦前沒銘謬屬余銘曰公舊隱姑射山房其誠子云當虧人及人虧時心神孰康當勝人及人勝時精力孰強當人知及人不知時意味孰長旨哉老虛靜易微滄滄涼涼夫烏知濂雒關閩之派之邇在晉陽條山東去河水西望有四青烏離哉是爲古儒者之藏爾後允臧

明延慶知州武公惟謙墓誌銘

李成名

侍郎

公諱惟謙字德光別號契元祁人先世詳行狀中公父尚時有隱德嘉靖末客于清豐蛻化彼地遂占籍焉公

於萬歷辛巳補清豐弟子員每考輒優叙時知名士若朱公冠張公養正同公誦讀尊經閣下不爐不扇者數稔廣文李君扁曰三鳳巢嗣是朱張成進士公亦乙酉中式北闈越明年偶以查籍仍以弟子員屬祁已巳拔於羣國士中乙巳筮仕爲懷慶倅善政種種具人心腑間庚戌擢延慶知州隣徼外戍卒與民雜處公百法調停惠威並樹人至今稱之蓋公才智敏練饒有精力雖轆轤藤茸迎刃立解居恒自奉極約而急人之急如赴水火人品心術王彥方一流人也癸丑以計典解歸日

偕姻友暢飲風流調笑愈老不衰庶幾其孔北海乎兩
孫承訓文譽藉甚行將聯翩濟姜爲奕葉之光焉公以
嘉靖三十一年四月十三日生天啟四年二月初二日
卒壽七十有三配陳繼段納李男一緯庠生娶何繼渠
女一適清豐韓生春孫男三之麟庠生娶許之鳳庠生
娶孟繼渠之英幼孫女一適李生而淳曾孫男一而文
娶戴曾孫女二一適原一幼將以某日葬公于白圭之
原先期介孝廉吳君狀丐銘余旣不獲辭誌曰天人之
際其不可知者耶以公世澤厚德宜致膺仕以慶于延
而十載勞人厥施未竟君子惜焉夫天之于人不急啟
其藏若閔若惜聽伊自致乃大發之以定其祥此羸縮
之凡人莫知者也公兩被躩踞夷裘坦坦不自極于窮
夫隱享天心克完其懿者與銘曰孰踦其名而卒克豐
孰敷其庸而俾不終謂異者人天實攸同第第有中惟
公之逢後嗣其興公藏永隆

大方伯戴公合葬碑銘

黃景昉

晉江

矯太岳之軒龍嘯晉陽之叅虎液汾淫潞跋德水於三
門非臺駘實沈之所治而伊祁氏之所振德區者歟稽

古帝而食流風必世騰德族况萬禩一開乾闔者 今
有聖人宜奮尺水注響歸昌若大方伯戴中齋公厥仲
之興以際實儕凱元之十六仲舉孝廉距公之捐賓客
東杓已十六指仲之對南宮成名進士距公掩玉東杓
又二十四指生堯鄉而出事 堯主臣服伊始廼重念
子事未終將乞假展夜臺卽余誥曰先子草宿矣封如
禮爰有馬鬣樹如禮爰有松楸其封度式位其樹數式
命亦如周家人典制李太泌之垂銘在室文西極表其
介事以行然皆卧石也則巋然勒立石者敢以先生請

余旣襟若先懿又不敢格孝子不朽其甫之意謹冒銘
表之概於講幄退食私寸晷而名頴生曰公代人也諱
光啟字仲升七世祖成忠始移家祁迄父賓以大名別
駕階奉訓爲鄉祀賢丈夫三子咸出許安人季卽公也
公卅而慧目光駛羣書行文則風生五指奉訓奇之以
爲繞日十匝壓玉千蹄者矣幼失慈哀踊若成人弱冠
翹聲半宮冠軍輒手擷遊於楊郭二先生其嗜學不巽
經臺董薛也登甲子辛未兩科于時乎髦落八月之焰
廷議用甲榜控之兼采才識鄭重不輕開邊釁者得公

永興志 卷十四
以出令會寧山荒隴口漠暗雲魂豈文密可持也公至
刷支費截蔓徭捐羨給郵呼索不及於哀鴻賦如畝無
額外淫也而東闈之女城約版不勞遂擁隱笳之玉堞
綠林偃隣邑擒其魁戮之卽本邑窟逋逃之桃花山亦
爲一掃各駭去草雉禽徧不煩將吏曲周王司馬大閱
邊令特刻公爲戡定才而邑人威之至名可止兒啼生
酌祠蓋鑰者百里睥睨殆萬餘里已 召人初給事工
垣其勁氣拔不周之風疏請以臬長典數馬泊典筦符
獻惟納旣自禮刑左右晉掌兵諫其間議詔旨議撫軍

臣議修問刑條例議中貴不應擅營騎議勲劉誠意世
延廢復辯謝之失當皆忠直中 上意大獎吏例有大
班糾劾公颺言聲振萬石鍾 上爲聳聽問左右而腹
其名它曰直經筵而屢勤 天顧固極稱殷遇也封永
和王甫繳節卽部行關以西三閱塞而八條事江陵輔
臣石其才寔心折之而申文定總試禮闈庚以公所進
甚得士外內武文何其胸萬介兵而復眼雙秋水也捐
怙脫經再主刑垣以序遂出公叅政河北時藩臬乏人
公入手數篆無指多視亂之虞而理衆絲若一殊甚楚

楚年不實公畫賑以生萬死人會建藩於潞以大役動
大衆將無厲公弗一民之勾懸錢召工邸落成而不騷
牖樞真至德可以飲食者乎晉觀察治兵西夏抗祁連
於其腦穴而隻臂莫拄者三面環衝且塞下皆健兒善
譁不善附一宿不飽坐者競起而公日椎饗投石超距
士爭爲可用肆督府梅公倚輕重市以讐敵至要賞而
中變敵且讐華人公策之三敵果出中策及裨將暗事
幾敗市公趣大將亟鼓前奪其息敵竟亡去督撫下汰
食之令衆以鄉大夫之豪者殺其腹羣起足相躡將脫
兜鍪呼其門公覘得情急召致之曰余柄餉餉失恒額
惟余咎弗恒額而溢是涎若輩謂吾劍不利耶衆頭地
崩接極謝無敢異乃遣去夫天剗昂畢必有鉅人爲不
鍵之玉門邊烽戍火半壁連于百城方方公於范龍圖
辟歷西夏而媚公者讓公之曩入春闈注私相子直緣
介甫舉雋而南宮爲和露倚雲之栽種獨許文穆廷直
之以明其不私且公作令時分閱秦闈雋六士而皆麟
之翹者肆飛言不翼也量移中原右岳郟人復牽臺臣
撫公曩事或曰是烏可無辯公曰蠻觸非所爲也掉頭

賦歸去堅以廿餘年分萍聚葉之賢冠而掛之松風雀
夢之間築適自園日遊讌所知每曠然得句自成幽致
誅祁荒而建六匡之閣以俎文昌置書院於半璜之右
爲學廡起頽於是祁士倍夙昔城之南有壽莊公自爲
兆且移先城瀕之曰一徑露霜將長與先人共寒食也
路謝金微矣而軍國大計常隱隱縈襟耳西夏警至曰
是固一檄可以定哮拜耳海上訶曰購倭匪畧勤遠亦
左謀其維持社稷深心無塹出處蓋數十年如一日也
居無病以哭其伯子太創竟假蛻行行頃猶喃喃臣事

君以忠制莠謂稿爾就木約公平生其器閣以深其才
練以達其應事遇物不賓賓小節而嚴於大閑愛其伯
氏義推督亢之田而親族待舉火者不減晏大夫之數
十家馭惡如冰雪能化卽不復問馭謗如風颺過身而
不可留痛絕請謁而遇地方利弊復耻作磨堯堅誠諸
子往往語逼古人雖以厥仲之瑞比鳳麇仍不忘引舌
相示也以萬歷之四十有一年卒崇正四年祔其程孺
人而合葬焉傳曰葬者藏也雖然蒙叟之欲德烏鳶怪
弗經而珠含玉歛錮金以封非固也聞之正有德邱衣

冠亦壽何藏之弗深但所思者藏骨而不藏名牡山牝
谷歲久變遷而老樹來風路人指點曰聞某公之生也
處家克大其家若此宜家之世不祧居鄉克賢於其鄉
若此宜鄉有社祀立朝克入忠一人出沐浴萬黔首若
此宜隨在有名宦祠茲隆然者其公與其元配之萬年
室耶則公雖藏而使公不能藏其德之在人心名之在
人口者真勾吳題札介山書郭硯首淚羊古今一嘆慕
不獨不可磨者爲黃子之一片神道碑也銘曰

天道回環浪息波澄五十年間復思江陵彼相也才大
車寔乘凡所樵獵悉爲薪蒸矯矯戴公聲宏髯美夜直
鑿坡朝請諫紙代藩節過秦塞車止竦立班心如果中
李翹材之館孰念平津將安將樂公轉厭人於人匪疎
於相匪親幻榮浮譽總屬灰塵惟有貞心蹈遐愈馥澤
湛鄉邦道尊巖谷如干仞姿如萬間屋神之聽之介爾
景福穀也食子茲語非誣鬱彼璿源是產靈珠仍求彩
筆高表黃壚不朽之託亦楚大夫晉楚何一日惟公志
曾叅薦棗屈到思芟不鄙聞音碑及鼯鼯萬有千春罔
敢失墜

雄令孺人范氏墓誌銘

文翔鳳 三水

范孺人門人許雄縣台儁配台儁祁人字六符六符試冠共輦孺人歸歸三日而文師促遊河汾書院比晉陽六符念新婦安能閨遽后王之則舅璋耶許蓋事世父母范卽善事世父母世父母語人孝妯娌亦云許生勸遊還則厥蚤有婦也生還以數日世父病告大漸至捐客范喪世父如儀禮經傳陰叶度閨人間譽甚弟若女弟之嗛緇帛五兩之御將則脫珥奩左成禮弟若女弟之不年則又手其呱呱者而子之其呱呱兒今兩生也哀

袞青子家矣其孺人其孺人許生善清貧然賓至必授几則孺人能爲不時需也蓋庶幾時聞珊珊佩其旣賢能書則誠之無通邑令長公儒先圭竇奈何以訟庭代食耶六符遊爲洪洞師洪洞士藪以禮宗母百士尚譁若衿婦哲皇帝元文子柄晉學是歲比士鄉秦御史聘詩房晉晉御史石首劉以問文子九十四璜之長其以孝廉隱者蓋三十有幾人而文子比之以觀藝則心善許云往哉其若諧矣文子夏五自汾如平陽過洪洞謂馬令今通政鳴世許生者吾命之房吾省詩也可令墨裝

且益力令曰此君不負先生舉者也昨陬收洪洞弟子員未以導入璜許有新命弟子遲遲費令亦促之使亟泣可納贊許爲恡故迂期不至茲亦足以概矣陽曲李令今御史元前祁令亦云許師忼質人也文子旣定平山之陽士洪洞則第一今御史劉令譽問許師劉生業奚如曰前御史觀風弁前文師亦弁先生之於士若面命之也馬令與臨汾劉令今御史四端語如許文子蓋九旬巡遂畢全晉之案以六月還晉臺則御史今中丞大名郭公新代至七月杪方伯今大司空南公語文子

郭公之檄吾省聘者許教官台儁也文子曰我所定以呈劉劉蓋案之以待郭者也南公曰子奚不李薦而以教官曰我長教問以教典之官可應以李耶然許生且得人此吾所弁之三十幾人之比藝獲者必不左許生入關闡得六士其冠房以涇陽馬御輦元御馬生遂冠其榜關闡之第一人少者則先夫子年十九大宗伯王衷白先年二十李空同先生年二十一大京兆呂定原先生年二十二其次則馬生稱少儁六符還以所錄士行卷呈晉臺文子則坐之勞之日子乃能變我關闡旣

元鼎志 卷十四
衰士曰弟子之不耐關士習太平平也秦材寧殫是亦
取其得夫子之調者二三子而已矣癸亥甲子之間文
子在南勲卿其門朱給事國棟令蕪湖贄以弟子禮命
之曰漢人受業稱弟子弟子之弟子門人也其少者門
童子於許吾門人也乃又弟子乎又四年戊辰其門劉
恩縣含輝亦成進士而文子避寇長安其門李昌齡仁
徵亦稱弟子李生馮學大蹈禮文子爲作直方大母傳
明年己巳元御亦避寇遷覃文子文子之獲收其士以
才參矣其獲元御旦夕問字過以爲賢於千萬人之不
同堂越天一方者而六符亦自洪洞令雄縣其婦皆久
之覃命孺人雄縣迫都門劇東郵之驂文子初令東海
過天雄嘗登其林令堂諳其俗蓋貂寺之所叢也雄有
先夫子門人郭吏部教之以少小諳其俗艱於治而六
符至則節貂寺之不律登其城曰茲不足盜當安屏敵
則大城雄不病一夫一緡之騷而樽節以層其堞耳者
如霞也稱雄城當己巳敵薄都其前騎塵近都縣令擐
甲而據其完城以堵變野清而壁堅矣城中人至自捫
其頸不知有無戴令欲歸家人其婦不忍去曰生死數

吾寧於夫子使夫子獨當敵耶蓋生之四十有九年而
乃始母國人以禮宗母諸顯士宜自貴尚謹若矜婦如
初俄告病命蘭浴撤浴而以正斃一子三息之先薨露
朝也環臍有庶兒全城烏夜啼至拂曉國人良異之比
於鵬其諸姬至逾年尚雪涕懷南樛之逮孺人哉雄令
不宜貂寺人公論重許令以予秦秦方有漢南之訶予
西鄉西鄉君過秦謁文子以十陬之長襄遂因馬生請
久孺人以載石則狀其冬又拼自西鄉因元御請也未
卽應明陬上日久拼自西云令有十日之暈如趙簡鈞
天之旣蘇蘇則曰得夫子以銘吾內蚤授一日之覽觀
是還丹我矣文子感之以一夕論次則歎曰吾道之於
許馬擬三世於說詩矣卽元御之娶尚能贊文子之苦
操於閨誦賢於此女不識孟子萬文子之銘其門人之
閨不越也銘曰祁冀天雄冀尚厥地建亘其嗣人勳爰
呂曲極帶元士第次其交蹤爲碩紀天不崧

孺人戴母程氏墓誌銘

張鳳翼 鳳門

程孺人者祁邑戴孝廉之母故方伯中齋公元配也當
中齋公捐館時孺人已七袞矣泣血撫膺幾經痛絕緣

諸子姓呱呱相向強起視事者復十有八年今考終於崇正辛未之四月啟方伯之壙而合葬焉禮也其子孝廉持頡太守狀匍匐數百里請銘於余余既不斐于文而病廢以來復奄然床箠亦何能搦管爲孺人志不朽然與中齋公有兩地維桑之雅而且夙企孝廉之賢母氏徽音耳之稔矣抑何能不効一言於墓石按狀孺人姓程氏於祁爲望族世有隱德父天喜以文學起家登里選高第學者稱爲西溪先生有女子四孺人其仲也生而婉變貞靜舉止不凡西溪公嘗謂其家人曰此女

有異質他日必偶乘龍之壻當画屏以待時方伯公爲博士弟子聲稱藉甚會問名納采遂許嬪焉于歸時才十三耳搯摻女手若不習婦事而孺人固內則優嫺也家室蘋蘩悉以身任凡潭湯醜面紉歲請補綴一稟于儀又推先世腴由以贍伯氏故人稱方伯公之孝友者必曰內德茂云方伯公旣攻苦下帷孺人復篝燈佐讀軋札呶唔聲相伴嘗達丙夜不休方伯領鄉書取甲第鷄鳴之傲居多也嗣是宦轍所經則又時操彤管雖內言不出於閫而珩璜報勵往往裨素絲于退食之餘故

方伯公歷官而稱名令尹名諫議名藩岳中壺之助也
當公爲給舍時嘗迎養太翁于京邸適奉有巡閱邊關
之命孺人晨昏定省問視有加洎寢疾則又手調湯藥
曲進滌瀉卽躬浣廁踰無難色久之不諱輒擗踊呼天
曰何遽奪吾舅致鞅掌者嬛嬛哉遂扶襯西歸喪葬之
儀情文備摯方伯公不至哀毀逾經孺人寬之者至也
初公考最洎再遇覃恩孺人凡受兩封亦禁貴重矣而
推布操作如故及稱未亡人猶服勤不怠更敦崇儉樸
常服率至數澣冠婚喪祭費各有經雖米鹽凌襍之微
無少屑越至樂善好施則不難倒儲以應故亡論媼族
賴以舉火義漿義粥之所暨環邇百里內載澤無窮若
夫宮觀津梁又在在爲檀越也孺人慈和端謹治家嚴
而有法嘗誡諸子姓毋驕毋惰毋侈泰失身又曰若輩
不成名我無以見乃公于地下肆今或廩于庠或升于
監或舉于鄉其它崢嶸頭角固未有艾也狀稱孺人具
四美謂孝親教子相夫惇族余以爲更備三難封號之
榮子孫之盛壽考之祺蓋未易數數見也今於崇正四
年四月十六日告卒距生嘉靖二十三年八月二十四

日享年八十有八子男三長濬昌縣學生卒娶祭酒閻公樸孫女次運昌卽孝廉娶淳化尹郭公儒孫女次沛昌太學生卒娶御史陳公功女繼三老權三省女女一適京兆田公疇子太學生慶年孫男六廷柙恩貢生娶太學生陳心鑑女繼庠生孔論女廷梅邑庠生娶三老渠通洛女濬昌出也廷桓縣學生娶三老任世廉女廷柙聘庠生文世顯女運昌出也廷杼娶別駕續孟陽孫女廷柙娶武舉王夢龍女沛昌出也孫女三運昌出者適布政使馬公朝陽子庠生禹中沛昌出者一適太學生陳奏堂一適寧化府儀賓程知務子振奇曾孫男三柙出者爲燻聘孝廉王中興女桓出者爲貝柙出者爲靖曾孫女三出于桓者二一字庠生李而洵子出于柙者一俱幼茲以本年閏十一月初三日祔孺人于方伯公之新阡順生死安榮哀備舉若孺人者可以無憾已敬撮其大者而爲之銘銘曰

結禱而爲淑女奉筐而爲孝婦傲鷄鳴而爲令妻和熊丸而爲賢母內德以貞何福不受宜爾子孫振振兮克昌厥後於戲孺人阡爲弗朽

文學戴濬昌墓誌銘

李成名 御史

寔余遊濬源詹公之門得友昭餘戴公伯仲兩公垂髫共學比於同氣同心余成進士出仕二十餘年仲公乃第南宮而伯公偃蹇不遇遊道山亦已久矣追思曩人邈不可得而感慨係之仲公書公行事千百言乞余誌墓余知公稔公雖卒終不忍其懿行遂泯泯也誌安可辭按狀公名濬侗如其別號也國初有成忠者自代郡徙祁是爲始祖四傳至文子文子緣緣生子巡檢公禮公禮子賓以大名別駕晉階奉訓大夫再傳而至中州

方伯贈通奉大夫光啟則公父贈夫人程氏則公母也公生而不凡性情篤至雍雍然和好近人與之交者如坐春風中讀書適自園一洞中洞上爲小徑方伯公往來其間每聞輿聲至人窺之見其直也一言一行必請命於父母母病衣不解帶者三越月許以身代公後得疾將革口猶不言病恐傷父母心其孝敬有如此方伯有三子公居長兄弟旣翁無間晨昏俱以文藝相切劘而兩弟忽病病且劇公輟席護之視膳視衣以代父母而無見於色人皆難之其友愛有如此學宮圯出資整

元集元 卷十四 三
之文昌閣毀出資建之貧者賑濟病者訓護亡者周給
人有言有伯子而世無困人其仁慈有如此至其爲學
於書無不博覽讀經則先大義讀史則先治體讀百家
則先典要棘闈兩經入彀而不果已西擬正魁填榜之
文總裁覓一私人不得悉罷所擬遺墨爲一時傳誦乃
負經術又如此使天假公以年而得遇於世其成就當
何如者而竟止於是豈非命哉公卒萬歷四十一年十
一月二十七日距生嘉靖四十三年十二月十三日年
四十有九娶閻氏祭酒公樸孫女再繼則朱氏李氏子
男二長廷柎舉人娶陳氏繼孔氏次廷梅貢士娶渠氏
孫男四上舉人娶孝廉王中興女綸府庠生娶進士張
暉妹詔娶韓氏俱柎出紳庠生娶王氏梅出曾孫男二
宸上出隆綸出皆幼嗚呼公可謂有後矣是可以銘矣
銘曰所不逢者時也所不達者身也而所不朽者名也
令德及遠發祥有自文學經濟於焉傳也大哉斯邱爲
無盡藏也

西鄉令穉觀許公墓誌銘

劉含輝
耀州

先生姓許諱台儁字六符穉觀其別號也先世爲河南

靈寶縣人始祖仲義僑晉冀寧之祁縣洪武間遂定籍
焉八世祖思舜是爲先生大父思舜生嘉賓乙酉舉武
闈次嘉賢先生父也淹博儒雅艱一第餽廩終身識者
惜之娶李氏生丈夫子二先生其長也髫齡輒古人自
命數萬言目過卽成誦十四而怙恃感疾卧床蓐先生
侍藥餌不解帶者累月顙天求身代竟大漸距五十日
兩親相繼見背世父亦卒總角鷄骨支床哀毀苦次出無
怡容君子謂先生於是乎知禮無何回祿肆焰先人墜
茨丹雘盡於一炬家徒四壁立先生詠歌不輟晏如也

十七補博士弟子員試藝嘗爲豪華者竊改衡文者摘
伏抵辜繇是學益力小軒橫經兀坐匡床熒熒藜火不
宵分不休也試冠曹偶督學器之命遊河汾書院萬歷
丙午薦棘闈上春官試從楚人鍾仲敬遊仲敬負藝壇
聲藉藉海內無多許可乃獨心折先生數奇不偶乃杜
門下帷雲龍閣課邑髦士三十餘人剔蠹訂豕無朝夕
暇後先以雋去者多出其門初諭洪洞時文宗歲試竣
子衿例宜以艇帛贄邑令促之遊先生故遲遲紆期不
赴曰余秉鐸而師表弟子奈何以廣文苜蓿藪苞苴耶

迨學宮束脩儀畢始策馬平水之陽鼎立文社因其邑
爲子野故地遂以正五弁社名取六律五音義也辛酉
秋秦省直指姚先生聘葩經房於晉三水文太青先生
實督晉學遂以先生甲諸孝廉命分校秦闡得六士其
榜元則涇陽馬元御御輦以文章牛耳菀林海內知名
士多宗之次則富平朱西崑國棟張懷陸橘高陵吳賓
於觀光咸寧李仁徵昌齡及余不佞璞玉含輝時嘖嘖
頌先生知人今上元歲秋杪先生分邑符宰雄縣清苦
矢諸神明愛民視諸子嫉邪視諸仇舞文逞智者咸咋
舌退避下車循聲蜚四野講堂教士甲乙品題匪怒伊
教尤體卹窶生不憚捐俸以給薪米佐沽啤天雄爲朝
宗孔道星軺宵旦不輟長吏苦之先生節省差繇每年
得工料羨錢三千盡以之創修公廨邑人罔不稱快者
高城浚隍垣堦較昔加厚三尺巍然雉堞有金湯之固
焉厥後有警易水燕山在在震虩而雄獨繕葺無恙史
氏陳明卿仁錫勒碑紀厥伐修理橋梁曲飲長虹築補
隄防高落漢鴈表揚往哲煥新古蹟墾荒田四百餘頃
俾襁褓之子頓田沃壤屯院李含真元特薦其徵收無

羨耗無加派一切陵工米豆硝鉛諸類每奉文密令長
鬻之夫預辦不以煩蚩蚩氓鄙文注上考天下第一每
對知己言那借實侵漁之別名調停卽廢弛之故態當
事者以爲名論乃筮仕時以舊令透支銀若干申報各
院遂爲豪有力者下石誣以多收耗銀註白簡下部查
覆士民數萬人伏闕上疏願借寇以雄密邇神京非慈
惠之長孰堪生我賴今上神明廉訪其詳下特旨降級
照舊管事不數日溫旨復下云降級原示薄懲倘能感
恩圖報應從原職優擢以彰不測殊恩前後疏凡十五

上旨八下始獲復原官倘非撫字心勞催科德普足以
格豚魚貫金石胡能以區區銅墨吏邀聖天子九重鑒
注乎三載考績上其卓行於天子天子庸之賜以繩金
鍛玉之函贈乃父母官如已官而復爲忌嫉者中傷尋
改吾秦之西鄉北至漢中徵糧卹民護城一一如前造
士衡文壽以梨棗更若過之性直遂清介每遇掣肘事
不能曲徇鬱鬱不得志未幾中痰壅遂決意賦彭澤歸
去辭矣抵家日行李蕭然菜蕪之貧不啻也然毫不以
溫涼芥蒂對知道故把臂開樽意甚適已嫺戚中有健

元集示 卷十四 三
訟者數月相持片言讐服之立解葺一廛顏曰近聖居
課子姓咿唔其中至衰白無倦容丁丑而疾始革十月
二十七日則先生易簀之期也得壽五十有八所著有
雲龍閣文稿遺失無存生平應事接物洞如觀火詳究
始終籌度利弊懸揣悉合符敦倫篤誼得之天性當其
痛廢蓼莪時二女弟一弟呱呱泣相向幾不能成立先生
撫育之愛勞備至擇配訓業內外無間言及乃弟卽世
仍留二孤提命而衣冠之永不另爨卽姜被不多讓焉
嫻友待而舉火者踵接也晚年德益邵書對聯於坐右

以自警曰希聖希賢作宇內第一流人物惟忠惟孝扶
世間億萬載綱常五倫中乾乾淨淨沒一毫欠帳便是
聖賢百年內齷齪齷齪有些子醜名不如乞丐捧誦格
言進德居業概可見已先生逝而其壻孝廉李君而洵
綜述懿行服官之大者求余紀幽宮之竈石念余不佞
辱在先生門士其烏敢辭但先生官不踰一令年未登
六秩宗族稱其孝友里閭景其任卹豐德而儉於遇爲
可惋惜耳竊憶侍先生聆竝論睨視嶙峋七尺軒軒如
朝霞舉丰骨矯矯如雲中鶴談論謾謾如松下風雙眸

炯炯如岩下電儀貌俊偉一望如汝陽王璉天人也胸中磊砢以酒銷之每飲一石不醉求其稍沈湎冀見如所謂玉山之將頽了不可得至於宏模大度吞雲夢八九不留纖芥然則彼含沙射影者奪先生以尺圭寸組實予先生以千秋令名矣元配師母范孺人克嫻女德先卒於雄縣署詳在文太青先生志及余同門馬元御狀中繼李氏王氏胡氏咸德儷俱先卒男子一子宣娶順天府尹田疇孫女女一適丙子孝廉李而洵卽今持狀請銘者也銘曰遇蹇矣厥德則豐守拙矣厥文則工

太霍太行隆崇有道浩氣摩穹手持巨斧闢濛陶鑄英髦洪洞起衰八代門中歐蘇沆瀣六龍循蹟漢陽英雄儷以女士德朋帝錫鸞章熊熊金石泐名弗替

國朝

黃梅縣知縣張公墓誌銘

鄭恂御史

祁邑張君壽菴乙丑科名甲第也余忝得同榜講兄弟之好歡甚繼而公補黃梅而余得量移山右訪其里居鄉人稱公懿行有古君子風歲己卯余分校晉闈公之嗣君實爲余門下士文章道義知公之開導不淺也及

余擢居臺省適張門人春闈報捷方待館選以窺天祿
石渠之藏而公溘然逝矣張門人因泣別余去越三月
將謀葬公於新阡寄狀請余銘余以世好誼不容辭按
狀公諱雲松字壽菴別號大林其曾大父諱文選登明
朝武科大父諱維父諱登殿世有隱德皆不仕以卒父
卒之日公之生甫六歲嶄然見頭角衆謂張氏有子矣
稍長能文於書無所不讀年弱冠餼於庠督學徐公延
諸幕命子弟執經問難於其前文名遂大震家世清貧
蔬水之費常不給公漠然不以介意而惟以文學起家

爲已任日夜攻苦與孺人紡績相伴常共一燈燈滅膏
油不繼則暗誦之如是者十年壬子遂領鄉薦壬戌捷
南宮所居祁之北左里有以橫逆待公者公不與校徙
居城中然猶篤念梓誼不置也值歲饑里人嗷嗷待哺
朝不慮夕公捐餽粥之資賑之得無恙縣公有好義式
瞻之扁旌其門及丁丑又饑時公已任黃梅矣又捐俸
賑之所全活者無筭縣公有博濟爲懷之扁旌其門凡
此皆公之厚德渥及於族黨交遊者也其官於梅也甫
下車孜孜以教化爲先務設義學四十餘所教民間子

弟梅邑科第寥落經公振作聯翩不絕至於潔已奉公
省刑薄斂惠之所及有在一時者有在數十年者有在
百年百世者年大中丞方以循卓薦公公適抱病遂不
果後銓部主政缺出簡命咨取公而胥吏以小故中
之又不果公慨然曰年踰六旬而有所不得行其志碌
碌薄書何所底止乎因致仕歸去之日紳衿士民奔走
相告如失慈母旣爲惠政編以紀其績而又以公所建
課士書院設位以爲公祠魏莊渠先生有言曰仕官而
能廟食百世者惟守與令信哉公生於崇正戊寅年正
月二十三日卒康熙丙戌年三月二十七日享年六十
有九娶張氏有賢行先公卒生子二長翰元增監生娶
馮氏早世次調元己卯科舉人丙戌科進士娶郝氏王
氏女二長適庠生鄭紹武次適翰林院庶吉士鄭爲龍
孫男一道隆翰元出孫女七其六翰元出其一調元出
以本年十月初一日葬公於縣東三汲村之南與孺人
祔合焉銘曰嗟哉厥初淡泊自矢好古敏求左圖右史
施於有政慈祥愷悌道賴以行民懷其惠老而致仕棄
若敝蹠有子能賢世濟其美

